

Imsan cu plan di ampliacion di servicio nefrologia y cuidu di wowo

ORANJESTAD - Dokternan di Imsan cu ta atende cu pashentnan cu problema di riñon kier promove transplante na personanan cu tin necesidad pa esaki. Y den e departamento di cuidu di wowo e enfoka ta riba mashinnan nobo pa por brinda pashentnan oportunidad pa haci operacion na Aruba mes.

Instituto Medico San Nicolas (Imsan) tin su Departamento di Nefrologia. Dokter Garcia ta encarga cu e departamento aki y el a splica cu e Departamento di Nefrologia tin algo mas cu un año cu e ta funcionando. Basicamente nan ta trahando cu e tratamiento di hemodialyse, cual ta un tratamiento di substitucion di e funcion di e riñonnan ora cu e pashent tin un funcion renal bou di 10%. Tin un otro tipo di tratamiento cu ta e dialisis

peritoneal pero esaki ainda no ta wordo realisa na Imsan aunke ta un di e proyectonan pa futuro, sr. Garcia a duna di conoce.

Imsan ta brinda consulta externo of Poli pa e pashentnan cu tin problema di riñon y esakinan mester wordo referi pa nan dokter di cas. Esaki ta e manera cu e pashentnan ta yega te na e Departamento di Nefrologia.

Sr. Garcia a agrega cu tin biaha e pashentnan a wordo referi door di otro specialistanan of internistanan cu ta detecta cu tin un problema of un fayó renal y nan ta wordo manda Imsan pa haya tratamiento. Un otro rason pa cual nan ta wak e pashentnan ta e parti preventivo pa purba di mantene of retrasa e evolucion di un malesa renal y evita cu e pashent mester pasa den un proceso di dialyse.

Ora di evalua e funcion re-

nal cu pruebanan via sanger, orina of ultrasonido por constata cu tin un insuficiente renal, Dr. Garcia a indica. Esaki kiermen cu e riñonnan no ta funcionando den un 100 porciento. Dependiendo di e severidad di e malesa lo tin mas sintomanan. E insuficiente renal cronico ta clasifica den 5 etapa. Un pashent den etapa 5 ta esun cu mester bay haya un tratamiento di dialyse. Entre mas severo ta e daño den e riñon, mas sintomanan ta bay wordo observa den e pashent, el a agrega.

Un otro plan ta pa cuminsa cu e tratamiento di dialyse peritoneal cual ta otro manera di tratamiento pa e insuficiente renal cronico. E esaki por haci e dialyse no traves di e sanger, pero traves di e bariaga, Dr. Garcia a laga sa. Esaki ta un tratamiento cu e pashent por haci na su mesun cas.

Centro di Cuidu di Wowo



E centro di cuidu di wowo na Imsan ta desaroyando den un clinica cu ta ofrece mas servicio, preparando pa por haci operacionnan y intervencionnan den e specialisacion aki den futuro cercano. Te awor ta manda pashentnan pa ricibi tratamiento medico den exterior.

Actualmente na e centro aki ta atende un promedio di 200 pashent pa dia y e team a crece di un especialista di wowo y un optometrista pa un team di dos especialista di wowo, tres optometrista y tres dokter assistent.

Viviana Mosquera ta un dokter kende a cuminsa traha na Imsan casi cinco año segun e optometrista Monique Rodgers. Imsan por yega na haci e operacionnan aki den futuro. Si tin e ekipo necesario y cu e aprobacion di Azv pa prepara debidamente, e transplante di cornea y operacion di glaucoma, entre otro por wordo haci na Aruba.

Cornea

Sra. Mosquera ta splica cu e centro tin awo diferente ekipo cu tecnologia nobo y ta sigui expande. Por ehempel, awendia ImSan ta e unico centro di ful Caribe cu tin un topografo corneal di tecnologia dual (placido rings y sheimpflug images), un mashin "top of the line" pa estudio y siguimento di enfermedad di cornea. Tambe tin laser biometry pa calculacion di special intraocular lens y estudio y diagnosis di intracorneal rings como tambe e control. Ademas, ImSan a adkiri un microscopico especular, cu ta wordo uza tambe pa cu estudio di e cornea di e pashent cu ta bay haci operacion intraocular.

Sra. Mosquera a comenta cu na Aruba awendia no ta haciendo e operacion di laser pa mehoracion di bista pa stop e uzo di bril, aunke si por haci diagnostico y siguimento di pashentnan. Adicional laser ta wordo uza pa traha riba e retina, catarata y intervencionnan pa cu glaucoma.

Glaucoma

Sra. Mosquera ta splica cu glaucoma ta un enfermedad cu hopi presencia na nos isla. Ta un enfermedad basicamente genetica y normalmente ta afecta hende mas di 40 año. Si acaso den famia tin hende cu presion di wowo, ta recomenda pa consulta un biahá pa año. Glaucoma ta un enfermedad silencioso y e peliger ta cu e por causa daño permanente na e nervionan di wowo y e persona por perde asina su bista pa semper.

Tin diferente tratamiento pa Glaucoma por ehempel gota pa reduci e produccion di likido den e wowo y otro remedinan cu ta stimula e salida di likido for di wowo, entre otro cu tin tambe laser pa baha presion y operacionnan cu ta un recurso cu normalmente e specialista ta warda pa hende cu no ta responde bon riba gotanan.

Wowo seco

Otro enfermedad hopi comun na Aruba ta wowo seco, cu tin como sintoma lagrimeo, segun sra. Mosquera. Tin diferente factor na Aruba cu ta influencia nos pelricula lagrimal manera airo, trabou tras di computer pa oranan largo sin descanso y temperatura. Pero tambe wowo seco por tin origen den e curpa mes, por ehempel un desbalansa hormonal of blefaritis cu ta un infeccion na cabey di wowo.

E dokter ta recomenda pa evita secamento di wowo, cual ta posibel den algun caso, pa e persona ora e ta wak television of traha tras di computer pa uza gota lubricante pa wowo y corda pa regularmente sosega e wowonan, simplemente cerando bo wowonan pa un minuut. Tambe laba bo wowo mescos cu nos ta laba nos cabey. Den e parti di nutricion, bebe awa y come alimentonan manera pisca (rico na omega 3) tuna, salmou y come berdura berde, Dr. Mosquera ta termina. □